

- c) Teléfono: 982-260078 - 80
 d) Fax: 982-260186

Lugo, 6 ABRIL de 2015. O PRESIDENTE, José Ramón Gómez Besteiro. O SECRETARIO, José Antonio Mourelle Cillero.

R. 1483

CONCELLOS

BALEIRA

Anuncio

A Corporación Municipal do Concello de Baleira, Lugo, na sesión plenaria ordinaria do 19 de marzo de 2015, adoptou, co voto a favor de cinco dos seus membros dos sete asistentes e dos nove que compoñen o número legal de membros da Corporación, o acordo que de seguido se transcribe :

“1º-Delegar na Xunta de Goberno Local do Concello de Baleira o exercicio das seguintes atribucións do Pleno:

- O exercizo de accións xudiciais e administrativas e a defensa da Corporación en materias de competencia plenaria.
- A declaración de lesividade dos actos do Concello.
- As competencias que como órgano de contratación lle corresponden ó pleno segundo o disposto na disposición adicional segunda do Real decreto legislativo 3/2011, do 14 de novembro, polo que se aproba o Texto refundido da lei de contratos do sector público, e que non requiran unha maioría cualificada.
- A aprobación dos proxectos de obras e servizos cando sexa competente para a súa contratación ou concesión e cando aínda non esteñan previstos nos orzamentos.
- As concesións sobre bens e adquisición de bens inmoables e dereitos suxeitos á lexislación patrimonial e enaxenación do patrimonio cando sexa competencia do pleno e non se requira maioría cualificada.

2º.- Publica-lo presente acordo no Boletín Oficial da Provincia de Lugo e no Taboleiro de Edictos do Concello. “ Baleira, 30 de marzo do 2015.- O Alcalde, Angel Enrique Martínez-Puga López.

R. 1421

Anuncio

APROBACIÓN DEFINITIVA DA ORDENANZA REGULADORA DO USO COMÚN ESPECIAL DO DOMINIO PÚBLICO LOCAL POLAS ACTIVIDADES EXTRACTIVAS DE MADEIRA NOS MONTES E ESPAZOS FORESTAIS DO CONCELLO DE BALEIRA, LUGO.

A Corporación Municipal do Concello de Baleira, Lugo, na sesión plenaria ordinaria do 19 de marzo do 2015 , adoptou, co voto a favor dos sete membros asistentes á sesión ,dos nove que compoñen o número legal de membros da Corporación, o acordo proposto pola Alcaldía que de seguido se transcribe :

“Denega-la solicitude efectuada por D^a Ana Oróns Mata, en representación da Confederación Galega de Empresarios da Madeira, e aprobar definitivamente a ordenanza reguladora do uso común especial do dominio público local polas actividades extractivas de madeira nos montes e espazos forestais do Concello de Baleira aprobada inicialmente na sesión plenaria ordinaria do 18 de setembro do 2014 ,coa seguinte modificación no texto da mesma:

No artigo 4.4 engadiráse o seguinte texto:”Unha vez presentada a comunicación e antes do inicio dos traballos o Concello realizará as verificacións oportunas sobre o estado dos camiños e vías da súa titularidade afectadas polos traballos incorporando fotografías do seu estado ó expediente. Elo sen prexuízo da posibilidade do/a comunicante de facer constar ante o Concello, antes do inicio dos traballos, calquera posible desperfecto que apreciare nas vías afectadas pola actividade.

-Segundo o disposto no artigo 70.2 da Lei 7/1985, do 02 de abril, Reguladora das bases de réxime local publica-lo presente acordo xunto co texto definitivo da ordenanza no Boletín Oficial da Provincia de Lugo e no Taboleiro de Edictos do Concello .”

De seguido transcríbese o texto da ordenanza definitivamente aprobada:

ORDENANZA REGULADORA DO USO COMÚN ESPECIAL DO DOMINIO PÚBLICO LOCAL POLAS ACTIVIDADES EXTRACTIVAS DE MADEIRA NOS MONTES E ESPAZOS FORESTAIS DO CONCELLO DE BALEIRA, LUGO.

EXPOSICIÓN DE MOTIVOS.-

A actividade madeireira ten suma importancia no Concello de Baleira debido a que boa parte da superficie do termo municipal está cuberta por especies forestais, polo que a incidencia do monte nas economías familiares do concello é moi importante, e cómpre darlle o valor que lle corresponde.

Conscientes da importancia do sector, pero tamén polos importantes custos que esta actividade xera nas infraestruturas locais e os trastornos e molestias que supón para o conxunto da poboación, preténdese regular con esta ordenanza os labores de xestión forestal no concello, que fagan compatible a liberdade de empresa e o desenvolvemento e explotación do sector forestal, coa preservación das vías municipais, promovendo unha explotación racional e sustentable dos espazos forestais. Todo elo, faise tomando como base as competencias dos municipios nos ámbitos da infraestrutura viaria e outros equipamentos da súa titularidade, e en materia de policía local, protección civil, prevención e extinción de incendios, planeamento, xestión, execución e disciplina urbanística, establecidas na Lei 7/1985, reguladora das bases do réxime local (na redacción dada pola lei 27/2013, do 27 de decembro, de racionalización e sostenibilidade da administración local) e na Lei 5/1997 de 22 de xullo, de administración local de Galicia, así como no previsto no Regulamento de Bens das Entidades Locais, aprobado por Real decreto 1372/1986, do 13 de xuño, entre outras.

Principalmente, esta ordenanza pretende velar pola debida conservación das vías públicas de titularidade municipal, que son continuamente obxecto de estragos por causa das operacións de extracción e saca da madeira, e da maquinaria forestal; así como velar pola seguridade viaria, na medida en que o deterioro dos camiños e vías de titularidade municipal supón, obxectivamente, un incremento da perigosidade potencial no tráfico rodado polas mesmas

Á vista do exposto, a ordenanza pretende a regulación da actividade extractiva de madeira no termo municipal, en canto supón un uso común especial das vías de titularidade municipal, agás aquela que poida considerarse de autoconsumo. Neste senso establécense unha serie de obrigas de xestión que afectan tanto ás empresas como aos propietarios dos montes e demais terreos explotados.

Para levar control das operacións forestais que se desenvolvan, o Concello requirirá a presentación dunha comunicación previa, para informar da realización de actividades extractivas de madeira, así como dunha fianza, para cubrir os posibles estragos que se produzan nas infraestruturas e no dominio público local. Ademais a ordenanza recolle un apartado de infraccións e de sancións.

TÍTULO PRELIMINAR: OBXECTO E FUNDAMENTO .-

Art. 1.- Obxecto e fundamento.

1.- De conformidade co disposto nos art. 25 e 49 da Lei 7/1 985, do 2 de abril, de bases do réxime local (na súa redacción pola Lei 27/2013, de 27 decembro, de racionalización e sostenibilidade da Administración Local), e 75 e 77 do Real decreto 1372/1986, do 13 de xuño, polo que se aproba o Regulamento de Bens das Entidades Locais, o Concello de Baleira establece a presente ordenanza reguladora do uso común especial dos camiños de titularidade municipal con motivo das operacións forestais referidas no parágrafo seguinte.

2.- Constitúe o obxecto desta ordenanza a regulación do uso común especial dos camiños e vías de titularidade municipal, constituído pola circulación polas mesmas de vehículos dedicados a saca e transporte de madeira derivado da explotación forestal dos montes e demais terreos radicados no término municipal, actividade forestal que consiste na extracción e saca de madeira dentro do termo municipal, para facela compatible coa conservación das vías municipais e coa seguridade viaria.

A ordenanza afecta aos actos que se desenvolvan e que teñan por obxecto o transporte da madeira (operacións preparatorias de corta, desprazamentos de vehículos e maquinaria, construción de ramplas de acceso aos terreos, depósitos e transporte da madeira etc.) facendo compatible a liberdade de empresa e o desenvolvemento do sector forestal no concello coa conservación das vías de titularidade municipal e coa seguridade viaria.

3.- Entenderase que existe uso común especial das vías de titularidade municipal cando se proceda ao transporte de madeira derivado de sacas forestais superiores aos 20 metros cúbicos.

Art.2.- Definicións.- Para os efectos da aplicación desta ordenanza, considérase:

- Actividade forestal: aquela que se desenvolve a partir do aproveitamento múltiple dos recursos que proporcionan os terreos nos que vexetan especies arbóreas, sexan de nacemento ventureiro, de semente ou de plantación, sempre que non sexan características de cultivo agrícola.
- Saca de madeira: deberá entenderse, para os efectos desta ordenanza, a totalidade das operacións que se desenvolvan dentro do concello, que teñan por obxecto a obtención e transporte de madeira de corta, incluíndo tanto as operacións previas ou preparatorias á corta (desprazamento de vehículos e maquinaria, construción de ramplas ou accesos ás fincas, preparación do terreo, etc.) como as posteriores (preparación e depósito da madeira, cargamento e transporte).
- Empresa madeireira: persoa física ou xurídica que realice os labores de preparación do terreo, repoboación, corta, saca, depósito e/ou transporte da madeira. Tamén abrangue a aquelas persoas propietarias que realicen algúns destes labores nas parcelas da súa propiedade, sempre e cando non sexa para o autoconsumo de madeira e teñan por destino a súa comercialización.

Art. 3.- Ámbito de aplicación.- O ámbito de aplicación desta ordenanza é o termo municipal de Baleira sen prexuízo das disposicións especiais que poidan rexer en zonas cualificadas como especialmente protexidas ou espazos naturais.

TÍTULO I: COMUNICACIÓNS PREVIAS E RÉXIME XURÍDICO.-

Art. 4.- Requisitos para as operacións de saca de madeira.

1.- Para realizar traballos de saca de madeira en plantacións forestais do Concello, cun volume estimado superior a vinte metros cúbicos, será obrigatorio presentar no rexistro xeral do Concello ou en calquera dos rexistros referenciados no artigo 38 da Lei 30/1992, do 26 de novembro, do Réxime Xurídico das Administracións públicas e do procedemento administrativo común, unha comunicación previa por escrito, cunha antelación mínima de tres días hábiles ao comezo das actividades. Elo farase sen prexuízo da necesaria obtención, con carácter previo, dos permisos ou autorizacións que, conforme á normativa vixente, sexan necesarios, xa foran da autoridade forestal, de conservación da natureza, de protección de augas, de preservación do patrimonio arqueolóxico ou calquera outra autorización sectorial que fose necesaria.

2.- O escrito de comunicación previa será asinado polo representante da empresa madeireira, debendo constar nel os seguintes datos:

- Datos identificativos empresa da madeireira (denominación, número do NIF, enderezo e teléfono, nome e apelidos da persoa encargada ou responsable da empresa).
- Especie de madeira obxecto da corta.
- Volume de madeira que se prevé extraer.
- Nome das fincas ou montes afectados, lugar ou sitio e parroquia, así como identificación catastral da finca ou monte afectado, indicando polígono/s e parcela/s.
- Datas previstas de inicio e remate dos traballos.
- Lugar onde se depositará a madeira á espera da súa carga, vías e/ou pistas de dominio público municipal e quilómetros das mesmas afectados polas actuacións.

Acompañarase ao escrito de comunicación previa a seguinte documentación:

- Copia compulsada da comunicación ou do permiso, autorización ou licenza de corta expedido pola autoridade competente e das autorizacións sectoriais que fosen necesarias para as actuacións pretendidas.
- Fotocopia compulsada do seguro de responsabilidade civil ou calquera outro similar da empresa madeireira que cubra os eventuais danos e prexuízos que poidan causarse con ocasión da corta e saca de madeira, así como do último recibo pagado, acreditativo de que o seguro está vixente no momento de realizarse as devanditas operacións.
- Fianza ou aval bancario segundo o disposto no art. 7 da presente ordenanza.
- En caso de actuar en representación doutra persoa deberá acreditarse a representación por calquera medio válido en dereito que deixe constancia fidedigna ou mediante declaración en comparecencia persoal do interesado.

O Concello de Baleira terá a disposición das persoas interesadas un modelo normalizado de escrito de comunicación previa, tal e como se recolle no Anexo I da presente ordenanza reguladora.

3.- Cando a saca de madeira se realice sen a presentación da preceptiva comunicación previa, o Concello requirirá á empresa madeireira ou á persoa propietaria do monte ou predio forestal o cesamento inmediato de tales operacións na medida en que impliquen o uso común especial das vías municipais e a presentación dun escrito de posta en coñecemento (o mesmo que o de comunicación previa), sen prexuízo da corresponde sanción derivada do incumprimento da obriga de presentación do mesmo.

Exceptúase de todo o anteriormente exposto, e, polo tanto, do disposto na presente ordenanza, a realización de cortas para usos propios domésticos, entendendo como tales os que non teñan fins comerciais e teñan un volume máximo de 20 m3.

4.- O concello poderá levar a cabo os controis e verificacións necesarias coa finalidade de comprobar que as operacións de saca e transporte se axustan ao contido do declarado na comunicación previa.

Unha vez presentada a comunicación e antes do inicio dos traballos o Concello realizará as verificacións oportunas sobre o estado dos camiños e vías da súa titularidade afectadas polos traballos incorporando fotografías do seu estado ó expediente. Elo sen prexuízo da posibilidade do/a comunicante de facer constar ante o Concello, antes do inicio dos traballos, calquera posible desperfecto que apreciare nas vías afectadas pola actividade

Art. 5.- Responsables.

1.- A empresa madeireira será responsable directamente de todos os danos e prexuízos a persoas e bens que se produzan ou ocasionen con motivo da saca, depósito e transporte da madeira, debendo reparar o dano

causado. O Concello velará especialmente para que as devanditas operacións de corta e saca de madeira non ocasionen danos nas vías públicas municipais e estas queden en axeitado estado de conservación, limpeza e seguridade.

A devandita obriga será esixible non só polos actos ou omisións propios, senón tamén polos cometidos por calquera persoa que, sen ser empregada ou traballadora da empresa madeireira, interveña nas operacións de corta e saca de madeira por conta, consentimento ou aquiescencia da mesma e, en xeral, polos cometidos por aquelas persoas de quen deba responder.

2.- As persoas propietarias das parcelas de monte e terreos nos que se efectúen actividades de extracción de madeira serán responsables, principalmente cando a corta se faga a feito en zonas con pendentes elevadas, da adopción das medidas precisas para previr tanto os riscos erosivos sobre o terreo como as posibles consecuencias da erosión sobre os bens públicos.

3.- O asinante da declaración previa responderá da exactitude e veracidade do nela declarado nos termos do artigo 71 bis) ,apartado 4, da Lei 30/1992, do 26 de novembro, do réxime xurídico das Administracións públicas e do procedemento administrativo común.

Art. 6.- Obrigas.

1.- A empresa madeireira estará obrigada a asumir os custes da reparación dos estragos producidos nas vías, nas estruturas anexas ou noutros elementos do dominio público local.

2.-A empresa madeireira queda obrigada á limpeza e á retirada dos residuos da corta de madeira, de xeito que as pistas, camiños ou espazos públicos queden en todo momento no mesmo estado de limpeza e conservación que tiñan antes de levarse a cabo as operacións de corta e saca de madeira. A obriga de limpeza deberá cumprirse todos os días ao final da xornada de traballo.

3.- Os depósitos de rolla, pólas, podalla ou demais restos non poderán invadir as zonas de circulación viaria, nin menoscar a funcionalidade das cunetas, gabias, canalizacións, pontellas ou calquera outra infraestrutura auxiliar ou anexa aos camiños ou vías, de cara a evitar riscos para as persoas usuarias.

4.- Prohíbese que os refugallos que non sexan estritamente vexetais queden ou se depositen no monte, vías ou lugares non autorizados. Os residuos asimilables aos urbanos seleccionaranse e depositaranse no contedor municipal axeitado.Os residuos industriais, especialmente, aceites usados, entregaranse a un xestor autorizado de residuos.

As empresas madeireiras e/ou as persoas propietarias dos montes e terreos afectados tratarán os restos forestais de xeito que minimicen o risco de incendio, dando prioridade aos tratamentos que supoñan a incorporación dos ditos restos ao ciclo produtivo agroforestal ou ao aproveitamento de biomasa forestal residual nas súas distintas variantes.

5.- A empresa madeireira estará obrigada a sinalizar as vías situadas nas zonas de extracción e depósito de madeira conforme ao establecido na normativa vixente en materia de tráfico, circulación e seguridade viaria.

6.- Prohíbese o uso das vías públicas para almacén ou depósito da madeira.

7.- A empresa madeireira ou o propietario forestal deberán derrubar e repoñer ao seu estado anterior as ramplas abertas para facilitar o acceso ao terreo ou ao monte, co obxecto de que, cando chova, a auga e a terra arrastrada non inunden e causen danos nas pistas ou camiños municipais.

As limpezas ou reparacións deberanse realizar nun prazo máximo de 72 horas a partir da retirada da madeira.

8.- De acordo co disposto na normativa urbanística vixente, queda prohibido efectuar desprazamentos de terra que polas súas características deban ser considerados movementos de terra.

Art. 7. Fianza.

1.- As empresas madeireiras deberán depositar unha fianza en metálico ou aval bancario en favor do Concello, co obxecto de responder dos posibles danos non reparados voluntariamente, segundo se recolle nesta ordenanza. Para os efectos desta fianza (que deberá ser depositada coa comunicación previa) establécense as seguintes contías:

- Volume de corta inferior a 300 metros cúbicos: 500,00€
- Volume de corta entre 300 e 1.000 metros cúbicos: 1.500,00€
- Volume de corta superior a 1.000 e ata 3.000 metros cúbicos: 4.000,00€
- Volume de corta superior a 3.000 metros cúbicos: 6.000,00€

A fianza que corresponda segundo volume de corta incrementaráse na contía de 500,00 euros por cada dous quilómetros de vía e/ou pista forestal que se vexan afectados polas actuacións comunicadas . Os tramos inferiores ós dous quilómetros prorrátense .

No caso de que a mesma empresa madeireira vaia realizar, ao mesmo tempo, cortas en parcelas contiguas, e para efectos do cálculo da fianza a aplicar, deberá computarse o volume total de madeira extraída desas parcelas e quilómetros totais de vía afectados.

2.- Unha vez comunicado o remate dos traballos por parte da persoa interesada, a tramitación administrativa do expediente da devolución da fianza completárase nun prazo de 30 días naturais, unha vez que os servizos municipais comprobaren a inexistencia de danos nas vías, nas infraestruturas ou no dominio público local. No caso contrario, non se producirá a devolución da fianza, ata que se resolva o expediente que ao efecto se incoe.

Art. 8.- Requerimentos. Normas comúns no uso da fianza non devolta e execución subsidiaria.-

1.- Unha vez que se advertiu o incumprimento da presente ordenanza, e de forma paralela á apertura do expediente sancionador, requirirase á persoa responsable da infracción para que se axuste á normativa e, de ser o caso, repare os danos e prexuízos causados, outorgándolle para elo un prazo prudencial fixado polos servizos técnicos municipais, que, en calquera caso, non podará exceder de un mes. Unha vez que transcurriera este prazo sen que se dea cumprimento ao requirimento, procederase, sen necesidade de novas notificacións, á súa execución subsidiaria, cargándolle os custes derivados á persoa responsable.

2.- Constatada a destrución ou deterioro do dominio público viario local ou a acumulación de restos procedentes das operacións de carga e almacenamento, o Concello poderá realizar, con cargo á fianza, as operacións de reparación, corrección e/ou retirada de restos, sen prexuízo da sanción que proceda. No caso de importe sobranse da fianza, procederase á devolución do mesmo.

3.- Se os danos foran dunha contía superior ao da fianza, o Concello elaborará un informe técnico sobre os danos e requiriráselle ao responsable para que abone as cantidades necesarias para a reparación dos danos ocasionados, ademais da fianza inicial, mediante a tramitación do oportuno expediente administrativo, de conformidade co previsto na Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común.

TÍTULO II.- INFRACCIÓNS E SANCIÓN.-

Art. 9.- Infraccións.-

1.- Son infraccións da presente ordenanza os actos e omisións que contraveñan o establecido na mesma. A comisión de calquera infracción levará aparellada a imposición aos responsables das correspondentes sancións, sen prexuízo da obriga de indemnizar aos prexudicados polos danos derivados da súa comisión.

2.- As infraccións da presente ordenanza, cualifícanse en moi graves, graves e leves.

-Constitúen infraccións moi graves:

- Non presentar, no prazo que se lle indique, o escrito de comunicación previa de realización dos traballos forestais, unha vez fose requirido polo Concello.
- Deixar as vías municipais nun estado de suciedade que supoña unha situación de risco para a seguridade viaria, segundo o informe municipal emitido para o caso.
- Causar danos nas vías municipais por valor igual ou superior a 9.000 €, segundo o informe municipal emitido para o caso.
- Cometer nun prazo dun ano, dúas faltas graves firmes na vía administrativa.

- Constitúen infraccións graves:

- Non presentar o escrito de comunicación previa, aínda que o achegue despois de ser requirido polo Concello.
- Deixar as vías municipais en deficiente estado de suciedade, segundo o informe municipal emitido para o caso.
- Causar danos nas vías municipais por valor inferior a 9.000 €, segundo o informe municipal emitido para o caso.
- Non demoler ou non repoñer ao seu estado orixinal as ramplas ou accesos que se abran para acceso aos terreos forestais.
- Cometer, nun prazo dun ano, dúas faltas leves, firmes na vía administrativa.

- Considéranse infraccións leves calquera outro incumprimento desta ordenanza que non estea cualificado como moi grave ou grave e a súa sanción corresponda ao Concello.

Art. 10.- Sancións.

1.- As infraccións desta ordenanza serán sancionadas coas seguintes multas:

- Infraccións leves: multa de ata 300,00€
- Infraccións graves: multa de contía comprendida entre 300,01€ e 1.500,00€.
- Infraccións moi graves: multa de contía comprendida entre 1.500,01€ e 3.000,00€

2.- A tramitación do procedemento sancionador non previsto nesta ordenanza, rexerese pola normativa xeral na materia e, en todo caso, coa audiencia e demais garantías procesuais para a persoa interesada. O órgano competente para a resolución do expediente sancionador será a Alcaldía.

3.- O importe das multas será graduado tendo en conta as circunstancias concorrentes e de acordo co establecido na normativa vixente.

4.- As multas e sancións impostas ao abeiro do disposto na presente ordenanza reduciranse na súa contía nun 50%, no caso de que se abonaran no prazo de 15 días hábiles a partir da notificación da multa ou sanción, e se a persoa infractora mostra por escrito a súa conformidade con estas, e renuncia expresamente ao exercicio de toda acción de impugnación no citado prazo.

5.- O pagamento das multas poderase esixir pola vía administrativa de constrinximento, sen perxuízo da esixencia, se fora o caso, das correspondentes responsabilidades civís e penais.

6.- As sancións serán independentes da reparación do dano causado e da indemnización de danos e perdas a que houber lugar.

DISPOSICIÓN DERRADEIRAS.- A presente ordenanza entrará en vigor unha vez se proceda a súa publicación no Boletín Oficial da Provincia, e transcorra o prazo de 15 días hábiles previsto no art. 65.2 da Lei 7/85 reguladora das bases de réxime local, permanecendo en vigor ata que se acorde a súa modificación ou derogación expresa.

A Alcaldía queda facultada para ditar cantas ordes ou instrucións resulten necesarias para a adecuada interpretación, desenvolvemento e aplicación desta ordenanza.

ANEXO I

COMUNICACIÓN DAS OPERACIÓNS DE SACA DE MADEIRA.

Datos da empresa madeireira
Denominación
N.I.F.
Enderezo
Teléfono
Nome da persoa encargada

Datos da propiedade forestal		
Especie de madeira obxecto da corta		
Volumen total da madeira a extraer (m ³)		
Nome das fincas ou montes afectados, lugar ou sitio parroquia		
Identificacións catastrais	Polígono	Parcela
	-	-
	-	-
	-	-
	-	-
	-	-
	-	-
Datos do aproveitamento forestal		
Datas previstas de inicio e remate		
Lugar onde se depositará a madeira, vías e/ou pistas de dominio público municipal e quilómetros das mesmas afectados polas actuacións .		

En aplicación da Ordenanza Reguladora do uso común especial do dominio público polas actividades extractivas de madeira nos montes e espazos forestais do Concello de Baleira (Lugo) , comunico o inicio de actividades forestais nas parcelas anteriormente indicadas previamente.

Documentación que achega:

Fotocopia compulsada da comunicación ou do permiso, autorización ou licenza de corta expedido pola autoridade competente e das autorizacións sectoriais que fosen necesarias para as actuacións pretendidas.

Fotocopia compulsada do seguro de responsabilidade civil ou calquera outro similar.

Fotocopia compulsada do último recibo pagado do seguro de responsabilidade civil.

Fianza ou aval bancario.

Documentación que acredite a representación.

.....a ... de 201..

Baleira, 04 de setembro do 2014.O AlcaldeAsdo.: Angel Enrique Martínez-Puga López. “

Contra o presente acordo, que esgota a vía administrativa, poderá interpoñerse recurso contencioso-administrativo ante o Tribunal Superior de Xustiza de Galicia, no prazo de dous meses contados dende o día seguinte á publicación do presente anuncio no Boletín Oficial da Provincia de Lugo .